

Lesen Sie nun die beiden Gedichte zum folgenden Paar:

„Zerstören hat seine Zeit, und Bauen hat seine Zeit“

Unger dr Krützblom

Dat Kreegsspektakel wor verklunge,
Dat uns vill dausend Wunde schlog,
Un als mer Kölle widderfunge,
Die Stadt en Schutt un Trümmer log.

Wie hät et Heimwiew uns gedrevve,
Wie of han mer die Frog gestallt:
Ov wal dr Dom eß ston geblevve?
Dä Dom, dä trook uns met Gewalt.

Bis endlich stundt ich im zo Fööße,
Dr Bleck erop zor Krützblom ging,
Mer däten uns ens ennig größe,
Ich fohlt, ich wor doheim am Rhing.

Hein Paffrath

De Bröck un der Rhing

Am Ufer fing et an.

De Autobahn

wollt üvver et Wasser jage.

De Stroß för dausend Wage

kennt keine Halt,

rennt met Gewalt

durch et Land,

eß an der Rhing gerannt

vun beidse Sigge

un well in üvverschrigge.

vun ungerwägs,

vun links, vun räächs,

Schrett vör Schrett

brängk se met,

wat ehr Platz un Levve schaff,

Minschewelle, Maschinekraff,

Stohl un Stein un Schwung

zom gewaldige Sprung.

Der Grund eß Stein,

hält beienein

deef en der Äd

der Stohl, dä dräht

vun links e Stöck,

vun räächs zor Bröck

un pack se zosamme.

Eesch kome, stampete, bröllte Ramme.

Dann links un räächs noh kooter Zick

sohch et us wie en große Fabrik.

Dag un Naach

met Gerassel un Kraach

blevv et Rhingufer waach.
Bal röcke die zwei Deil vun der Bahn
noh un nöhter zo sich eran
us unendliche Fäne,
bis se sich üvver dem Wasser begähne.
Un drunger flüüß em Sonneleech
me'm selve große stelle Geseech
wie naaks beim grelle Lampesching
der ale, junge, iwige Rhing,
ohne sing Welle

ov gar sing Droppe
dobei zo zälle,
höt wödig kloppe
de Hämmer op Stohl
un denk sich nor: „Die Bröck hält Pol.
An mäncherlei Zigge
op beidse Sigge
ben ich elans gedrevve
un immer derselve geblevve,
drog Scheffe, Naache
gedöldig un laache,
wann Minsche op Bröcke
zo Foß ov en Wage
üvver mich jöcke,
ich kann et verdrage.
Ich loße se wandre.
Kütt zo dä andre
Bröcke noch ein –
Dat paß meer!
Se halten et Land beienein.
ov links, ov räächs, dat Land eß ming
un bliev dem Vatter treu, dem Rhing.“

Johannes Theodor Kuhlemann